

四庫全書

史部

欽定四庫全書

史部

東征集卷

四至
六

詳校官編修_臣李潢

編修_臣裴謙覆勘

總校官進士_臣朱鈐

校對官典簿_臣郭祚熾

謄錄監生_臣余士榮

欽定四庫全書

東征集卷四

廣州府知府藍鼎元撰

論臺鎮不可移澎湖書

臘月望後三日連接憲翰五函及馬守備安遊擊口述
鈞諭俱令某暫駐臺灣不可遽爾班師竊惟此時臺中
大定署鎮黃總兵足資彈壓以某越俎久淹自顧亦覺
無謂况建議已令臺鎮移澎湖易來副將是一總兵處此

尚嫌其多而某又為蛇足獨留不去竟似貪戀雞肋殊堪羞慚裁營減兵之說臺人聞知頗有囁囁偶語者某告以部議未足為定必待督撫提臣遵依具奏方可施行茲承憲檄減兵及裁回將弁名數某尚秘不宜露望早晚或有變更若果臺鎮移澎湖則海疆危若累卵憲臺亦欲確遵部議耶部臣不識海外地理情形憑臆妄斷看得澎湖太重意以前此癸亥平臺止在澎湖戰勝便爾歸降今夏澎湖未失故臺郡七日可復是以澎湖一

區為可控制全臺乃有此議不知臺之視澎湖猶太倉外一粒耳澎湖不過水面一撮沙堆山不能長樹木地不能生米粟人民不足資捍禦形勝不足為依據一草一木皆需臺厦若一二月舟楫不通則不待戰自斃矣臺灣沃野千里山海形勢皆非尋常其地大于福建一省論理尚當添兵易總兵而設提督五營方足彈壓乃兵不增而反減又欲調離其帥于二三百里之海中而以副將處之乎臺灣總兵果易以副將則水陸相去咫尺

兩副將豈能相下南北二路叅將止去副將一階豈能
俯聽調遣各人自大不相統屬萬一有事呼應莫靈貽
悞封疆誰任其咎以郭子儀九節度之師而不立元帥
統攝尚且師徒潰散況今日耶澎湖至臺雖不過二三
百里順風揚帆一日可到若天時不清颶颶連綿決旬
累月莫能飛渡臺中百凡機宜鞭長不及以澎湖總兵
控制臺灣猶執牛尾一毛欲制全牛雖有孟賁烏獲之
力總無所用今在廷臣工莫有敢出一言為

皇上東南半壁封疆之計何異欲棄臺灣乎臺灣一去
則泉漳先為糜爛而閩浙江廣四省俱各寢食不寧山
左遼陽皆有邊患某庸愚無識以為此土萬萬不可委
去特恨位卑人微處不可言之地想憲臺與中丞呂公
提軍姚公必有一番議論為社稷蒼生回天指日或會
疏入

告或密摺婉商造萬世無疆之福非某所敢饒舌也若
遵部議而行必悞封疆彼時九卿豈肯平分其咎某杞

人妄憂中心如焚非特為桑梓身家之慮惟望恕其狂
瞽且賜明示解惑焉

覆將弁矜功缺望書

伏承憲檄以提標前營遊擊林秀澎湖協右營守備林
亮及千總胡廣等三人並怙功自矜心懷缺望每有不
平之色時出怨誹之言令某當衆嚴加申飭此自憲臺
教誨盛心激勵裁抑以玉於成遵即傳集將弁宣布飭
檄俾皆退然自斂無再伐善施勞致干咎戾惟是三人

情性不同謙肆各別有宜畧加優容不必一槩督責者
林秀缺望所不能免但彼在軍頗為出力即如大穆降
追賊將弁有未勇往者秀遽以軍令驅之且申文請斬
遊擊齊元輔以肅軍紀則其目中不有同列也久矣後
見南北二路叅將員缺俱畀他人不能無怨誹不平之
氣然此

國家驍將也其舉動雖不循規矩而膽畧可嘉有事疆
場不惜軀命似當于驪黃牝牡之外別立一格待之如

馭惡馬不可使之踉蹌又當勿吝每食盡穀一石以稱其量此日誠諭裁抑使彼降心下氣如背負芒倘遇副叅員缺不妨破格題遷俾喜過望恩威並濟未有不愧感交集者也林亮平臺先登論功第一固人人而知之不待其自矜表白但某所敬亮者尤在保守澎湖為功之大當朱一貴作亂之初臺灣報陷澎湖協將弁議棄澎湖各遣家屬登舟亮以一末弁排衆議仗劍奮呼遂固疆圉不特義勇冠三軍其于臣節亦皎然星日矣鹿耳

先登安平先登西港先登未嘗自鳴得意至于入府之
日諸將或貪小利封人舖屋獨亮部伍肅然不動民間
一草一木今臺平已經逾載諸將紛紛遷轉副叅遊都
纍纍若若獨亮依然守備在廠督修戰船盡心竭力如
治家私無一毫怨誹不平之氣庶幾當于古賢將中求
之區區遊擊一官尚兩載不可得所當亟懇憲臺計功
錄用以服軍前將士之心者也胡廣雖千總末弁然鹿
耳門奮勇奪險實從林亮先登乘勝攻克安平大戰鯤

身收復府治勞績顯著加以人材魁偉氣度亦異僅處
偏裨之任尚未足稱其才況令久屈末弁至今弗獲寸
進不平怨誹亦屬常情惟在憲臺急加擢用將感激圖
報之弗遑而亦何期望之有總之三人雖有純疵之分
俱皆

國家良將林亮林秀英勇無敵胡廣技能亦屬出衆而
亮更有巧思製造魯公車子母礮不推自行戰船精妙
弗可思議又加以賢德洵卓卓不可及也三人所就

俱不可量風聞之語亦難盡信惟執事稍加優容焉

論舊兵停餉撤回內地書

舊兵收回効力已經半載有餘搜捕操防並無失伍忽承憲檄以二千餘名糜餉不貲且其昔日在臺皆失封疆之士不能効死覲為賊民宜一切革去名糧逐回內地見今冬餉即為停止某竊思之此輩從前失地損威辱

國罪不勝誅業蒙憲恩寬大檄令于王師進討之時奔

投大軍歸正効力是以前後收伍有此二千餘人自閏
六月領給糧餉至今隨征南北入山搜捕奮勇前驅已
忘其為前此失守之士矣今追論前過在彼自無可辭
但以從前憲檄為欺已于心亦微不服賊醜跳梁全臺
俱陷文武員弁紛紛竄逸遊擊周應龍張彥賢等四五
十員或逃或匿從賊失節俱皆醜然軍前効力未聞市
曹之上正法一人獨責舊兵以不能効死恐彼將嘵嘵
有詞也昔日勿為收伍彼自垂頭去矣收伍之後依然

官兵月給餉糧養家贍口今一旦盡為革除失其生計
仰事俯育將何所資怨望積于中飢寒迫于外欲保其
不為盜賊蓋戛戛乎難之頃奉部檄總兵官移駐澎湖
裁去臺灣水陸兩中營減兵二千士庶囂囂懼亂復作
一二無賴布散流言正在安戢釋疑焦心勞思之不暇
豈容復益以二千餘名之舊兵革糧怨憤攘臂一呼無
賴子弟皆起而為盜賊非綏靖邊疆之道也某幸荷知
已言聽計從事闕

國家不敢因循召變謹封還憲檄乞執事再為熟思可
否念其還伍已久効力半載仍聽在營操防出自格外
弘恩倘萬不得已欲去其籍亦須姑遲一兩月檄令內
地各營班兵來臺換回彼在此間則有二千餘人及其
換回內地分散八府一州每營不過二三十人然後徐
飛一紙裁革名糧此在執事掌握中耳何必張皇急遽
驚動海疆之聽聞乎勿謂蚩蚩其勢可畏束縛窮蹙禍
起目前不知執事以為何如也

論征臺壯丁停餉歸農書

伏承憲檄以征臺壯丁千餘人不在經制兵額之內月
糜糧餉無處開銷今地方事定可即停止月糧諭令回
籍務農無許留滯臺灣或致生事竊思此曹召募之初
原許給與名糧造入兵籍俾出死力以建功名上功題
薦特用中功輪補把總餘皆編為經制如例拔擢隊目
是以壯丁感激奮勇前驅凡有戰陣所向無敵今地方
事定正論功行賞之秋酌酒相慶顙望功加部劄者不

知凡幾一旦停止月糧令回農畝將無視為空中霹靂
可驚可愕之事乎滿腔熱血所望功名捐軀命冒鋒鏑
膏塗原野而弗顧豈其志在一兵奈何併一兵而革之
怨憤之氣上干天和嗟嘆之聲心傷行路如之何其可
也小人無知曉曉有詞謂事急欺我以出征事平束我
于高閣昔許我官今吝我糧人而無信不知其可鳥盡
弓藏復見今日某惟有啞然憮然實不知將何以對之
君子不可失信于民況煌煌憲諭墨藩未乾豈可遽自

食言授小輩以口實灰軍前將士之心塞將來得人死
力之路竊謂執事當必不然耳海外反側之地人衆至
千不可不為提防使千餘人俛首遵命覓舟配載亦已
駭人耳目萬一掉臂弗依勢難中止懾以兵威遂成變
亂此曹昔在內地原昏亡命之徒所以招致軍前實為
潛消伏莽非僅欲得其死力出征以來一人當十十人
當百倘今激變昏為勁敵豈能以一鼓盡殲之哉某謂
此千餘人萬不可棄棄此強兵實為可惜況負失信之

名自處艱難之地似不如仍留在伍汰內地各營老弱以補之為

國家儲有用之精卒為營伍收得人之實效一舉數美望執事勿吝轉圜焉情詞急迫唐突尊威伏惟收回原檄俯賜中止恕罪恕罪

請班師書

臺灣已經大定軍士久役思歸班師之期再不容緩臘月十四日守備葉應龍到臺詢知粵省姚提軍改調厦

門不勝手額既有金門黃總兵署理臺鎮足資彈壓新
提軍又慶得人東南鞏於磐石矣此時山際廓清南路
阿猴林北路大武壠中路羅漢門等處所有窟窠俱已
搜尋焚山烈澤寮棚燬盡匪類逃散湮滅無蹤雖王忠
劉富生二人未獲亦已狼狽顛連無地逃生旦暮就縛
此後或有妄報訛言執事亦不必聽之矣此間莠民固
多而捕風生事獻諛要功之輩更復不少一紙入報雷
厲霆飛非賊而加以賊名無故移人之村落驚疑四起

家家自危此召亂之道也某在此間尚不自量恃蒙執事之愛每封還憲檄為民請命皆荷仁恩寬大終賜曲從是以地方諸凡相安不覺若某行後誰復肯專擅任過以撓大憲之逆鱗依文行文或至擾動不可收拾敢期執事將前後密差在臺採訪弁員悉為撤回一切地方事宜惟臺道府縣是問彼職司民社擔負在肩治亂安危事關切已未必皆視隔膜不如差弁之盡心且平日讀書明理閱歷世務未必俱皆暗昧不如差弁之聰

明某不學無術竊謂鷹犬止可以獵狐兔不宜他有所
用勿論此輩把持不定利欲薰心所言未必皆實即使
矢念不欺難保其不為人欺惟執事加之意焉新提軍
歲內可至某當躬趨赴厦交代兵符不便久留臺中致
滋物議請飭在厦舳舻星速來臺配載班師曷勝望切
覆軍前將弁可當大任書

曩承密札從征將弁可當提鎮之任者令具甄別高下
臚列薦知不勝惶悚夫人非久于相聚安敢遽定其生

平況功名有數原不必盡皆稱量朝編卒伍暮擁節旄
李廣難封馮唐易老誰雌誰雄亦似難以一言斷也況
某淺陋粗疎素未有知人之明偏見測度恐未必中但
以憲諭諄諄不得不據臆妄談惟執事權衡斟酌焉水
師提標前營遊擊林秀南澳鎮左營守備呂瑞麟皆剛
愼傲上有好大飛揚之氣然胆畧並優勇敢出羣實

國家之驍將也秀矜誇瑞麟沈鷺秀不拘細謹瑞麟凜
于操持弗擁節旄二人俱弗肯已但瑞麟似較遠大耳

閩安協左營遊擊朱文小心謹慎雖剛毅不足可當一面藩籬之寄汀州鎮左營遊擊王紹緒整飭營伍有輕裘緩帶之風福寧鎮右營遊擊郭祺老成練達海壇鎮左營遊擊謝希賢簡易果敢雖不無鹵莽之處要自瑕不掩瑜撫標左營遊擊邊士偉曉暢軍務金門鎮右營遊擊薄有成質直嚴肅陸路提標右營守備康陵壯猷嚴厚漳浦營守備蘇明良謙和謹飭烽火營守備蔡勇雄偉樸實興化協左營守備劉永貴剛勁端嚴諸人氣

度似與偏裨稍別皆太平之良帥也澎湖協右營守備
林亮平臺首功且有抗守澎湖之大節人品將畧在軍
前諸將以上提鎮之任靡所不宜將軍標右營遊擊魏
天錫海壇鎮右營守備魏大猷係同胞兄弟皆奇諳水
性能頂盔束甲游海面又能赤身入海底潛行一二百
里如安平鎮至臺灣府水程五十里大猷天錫入海中
潛行頃刻即至同安營守備葉應龍銅筋鐵骨刀棍不
能傷以石擊其頭石反碎三人皆奇傑卓犖非尋常將

弁可比畀以封疆誰曰過分但魏天錫已病恐不及待
節鉞耳千總董方胡廣李郡林君卿皆將帥才董方好
大矜功恐未免為人所嫉胡廣勇銳英發李郡厚重精
明殊不可量林君卿果敢質實罔憚勤勞四人皆志切
上進不願以偏裨自擬雖見居下弁勃勃有封疆之氣
未可以名位微末少之其餘諸將所見未真不敢強解
大抵英才尚多昂昂千里嘐嘐志氣自以為武莛頗牧
欲取斗大繫肘後固人人如一轍也或才雖庸而福則

厚器不足而遇有餘天下事非可以意見測度亦在用之而已用然後知長短惟執事權衡斟酌焉不揣冒昧憑臆臚列執事秘勿示人免衆人怨謗口舌則幸甚

請寬楊姓株連書

伏讀憲檄林亨等一案飭捕南北餘孽及調遣水師兵丁策應具見去疾務盡苦衷但中間有于溝尾楊地方督責楊姓窩藏叛逆着落究出楊來將楊族俱遷內地原籍安置等語則職等竊有欲叅末議者溝尾楊非他

即溝尾庄楊旭等一族是也楊旭楊石楊雄聚族倡義
誘擒賊首朱一貴翁飛虎張阿三王玉全等方蒙賞賚
又欲擢用數人補授弁職此族豈肯復萌異志窩頓楊
來設使楊來未死亦必在內山深處彼平居作賊害人
况云竿首藁街豈敢復出優游里社此等奇貨誰能忘
情欲洩忿者已多欲獻功者亦復不少而溝尾庄去諸
羅邑治二十里當孔道之衝楊來母妹尚不敢安其居
逃匿他所正月中旬正遍處緝拿楊來母妹之日而謂

來安坐家中與陳法相見招集為匪莫過而問有是理乎賊口鴟簧此類甚多雖不敢不信為真以密為訪緝亦不可遽信為真以輕滋擾累從來亂賊激夥皆用此計必誣指良民飛殃煽禍使黑白混淆無地逃生今日風傳欲拿某處明日風傳欲勦某村人心惶惑厭畏官府因有鋌而走險墜其奸謀此之不可不慮也溝尾庄楊姓數百人聚居已久室家婦子相安耕鑿今以莫須有之楊來之故遂令闔族遷徙棄而田疇舍而廬舍是

無罪有功之民流離失所于堯天舜日之下作賊亦死
不作賊亦死鳥窮則搏獸窮則鬪勢必臨以兵威將此
數百人盡行誅滅而後可已竊恐誅滅此庄他庄又懼
誅滅以訛傳訛將安所屆刺下三林竹仔脚兩案大盜
未能悉數擒獲埔姜林水沙連大湖臺灣山後諸說正
在傳疑未能徹底廓清鎮靜密訪則以次就縛如捕雞
豚發擿過急則驚疑四起必生他變職等受恩深厚不
敢不竭狂瞽之言惟祈垂諒採納以安全臺人心裨益

非淺鮮耳職雖庸駑然於地方之事日夜廢寢忘餐並
無寧刻深山窮谷開闢以來人跡不到之地尚欲以番
通番深入搜求冀得擒獲逸賊淨盡根株況在郊關之
內通衢大道之中苟真有窩匿楊來及王忠等類之處
斷無敢掩耳閉目聽其安然自在致費憲心遠慮之理
伏惟察照俯賜中止地方幸甚

論哨船兵丁換班書

臺澎水師換班之兵自當悉數遣發不使私留一人

諭旨當遵憲令亦不敢違也但哨船中舵繚斗旋各兵則有不可更易者蓋闔船性命關係數人之手而臺澎洋面橫截兩重潮流迅急島灣叢雜暗礁淺沙處處險惡與內地迥然不同非二十分熟悉諳練夫寧易以駕駛哉內地所來換班之兵雖曉水務畢竟礁脈生疎不可倚賴而習熟可賴之舵工水手則內地水師各營俱欲留以自用誰肯舍已讓人縱令換班于遠勢必以疎劣嘗試苟且塞責以

朝廷戰艦官兵供斯人美錦學製之具希圖微倖于萬
一蓋亦危矣幸得苟安無事以庶幾港道漸熟瞬息三
年瓜期又至終不能長有此人不幸而中流風烈操縱
失宜頃刻之間不在浙之東廣之南則扶桑天外一往
不可復返即使收入臺港礁線相迎不知趨避衝磕一
聲奮飛無翼以

朝廷戰艦官兵斷送于換班舵繚之手是良法美意適
以傾人性命斯亦

當宁所惻然傷心不忍聽聞者也夫事有經權法有通變與其悔之於後何如慎之於初執事經濟宏深忠誠為國不識尚有轉圜之機可於此中畧為籌畫否上則繕疏入

告次則設法酌留依阿隱忍坐觀其敗諒高明必不出此惟執事留意焉

覆呂撫軍論生番書

望後二日接讀教言惓惓地方心焉識之臺中奸宄變

幻百出雖厚集儼臨尚恐不足鎮壓邪心若移鎮澎島
往來巡視謂可安靖地方則仰賴

聖天子威靈士民福命外此全無可恃之處也生番殺
人臺中常事此輩雖有人形全無人理穿林飛箐如鳥
獸猿猴撫之不能勦之不忍則亦末如之何矣惟有于
出沒要隘必經之途遊巡設伏大張砲火虛示吾威使
彼畏懼而不敢出耳然此皆由于地廣人稀不聞不聚
之故非因侵擾而然蓋生番所行之處必林木叢茂荆

榛蕪穢可以藏身遇田園平埔則縮首而返不敢走過
其殺人割截首級烹剝去皮肉飾髑髏以金誇耀其衆
衆遂推為雄長野性固然與民人墾畝採樵生業全無
干涉亦無熟番仇殺推諉生番之事某已准提軍咨移
特遣前營林遊擊帶兵百人前往會同營縣設法防閑
或可稍為斂戢究未有長策也然則將何以治之曰以
殺止殺以番和番征之使畏撫之使順闢其土而聚我
民焉害將自息久之生番化熟又久之為戶口貢賦之

區矣但畫界避番之議方起此說且存而勿論可也

請行保甲責成鄉長書

臺疆遼闊已極臺民不馴特甚皆內地作奸犯科逋逃
萃止豺心鼠性隨處欲張邇者北路地方竊劫頻聞涓
涓之勢漸不可長苦防汛照管不周真有顧此遺彼之
患兼班兵自遠新來良匪情形路徑要害皆生疎弗能
熟悉延建汀邵福興福寧兵丁音語不同不能細偵密
訪如柶鑿方員之不相入即有二千協防尚不足供措

置況又有掣回之憂茫茫千里星星塘汎勿論移鎮澎湖必致覆餗即駐臺亦難高枕而卧也某夙夜兢兢惟恐有辜

朝廷付託之重負知己培植之恩實切悚惶所望二三賢能文職振奮精神以實心行保甲之實政家家戶戶自為清革使盜賊無自而生聯絡聲援守望相助如常山之蛇擊首則尾應擊尾則首應使盜賊無托足之地雖不設立官兵亦何不可但今保甲之法久已視為具

文虛應故事莫肯實心料理而署事各官又皆有五日
京兆推諉後人之意真末如之何也團練鄉兵亦是靖
盜一法憲臺以其亂後强悍成性欲仁漸義摩納之禮
讓之中誠為移風易俗要道但今盜賊衆多不可不先
為剔刮鄙人愚見以為作賊可以欺官不可欺民能避
巡兵不能避鄉里莫若因其勢而防範之就各縣各鄉
僉舉一幹練勤謹有身家顧惜廉恥之人使為鄉長就
其所轄數鄉家喻戶曉聯守望相助之心給之遊兵以

供奔走使令之役如有一家被盜則前後左右各家齊出救援堵截各處要口務必協力擒獲又設大鄉總一二人統轄各鄉長督率稽查專其責成鄉長有生事擾民縱容奸匪緝捕不力救護不齊等弊大鄉總稽查報查如有失察一體同罪是雖無鄉兵之名而衆志成城不啻有鄉兵之實今擬臺灣中路設鄉長六名南路鳳山設鄉長八名每縣各立大鄉總一名統轄之北路諸羅設鄉長十二名立大鄉總二名分轄之每鄉長一名

准給養遊兵四名大鄉總一名給外委千把總銜劄以
榮其身准養遊兵十名其遊兵名糧每月銀一兩米三
斗就官庄內支給以為贍養之資計三縣遊兵一百四
十四名每月支銀一百四十四兩米四十三石二斗三
縣鄉長共二十六名大鄉總四名應給養廉多少憲臺
酌量定奪伊等工食既皆仰給于官則與官兵一例文
武均行約束調遣無敢不從凡地方有竊劫盜賊就各
鄉長限要限期緝獲解官究處初限不獲拘遊兵比責

再限不獲鄉長罰月糧工食戴罪圖功三限不獲拘鄉
長正身重懲大鄉總記大過一次凡盜賊不能緝獲至
三次者鄉長責革大鄉總追銷外委職牌以示懲勸雖
月糧似覺傷重但為地方之利自不得顧惜小費欲行
節省則每名每月銀七錢五錢亦可米三斗不易也無
月糧則彼將生事擾民以為食非徒無益為害更大且
天下亦無枵腹而為人辦事之理必有資其養廉方可
責以清操大鄉總能幹練辦公勤謹三年無過犯有綏

靖地方實蹟量行擢用以示鼓勵某庸陋無知總為地方念切

廷議既不肯添兵不得已而思以人治人之道任用得人便可不勞而理不知憲臺以為何如也

請權行團練書

凡事有經有權似當隨時變通難膠一定曩讀憲檄安輯地方事宜有團練鄉勇在臺地萬不可行宜興保甲之法以鄉約義學柔和其心性此誠移風易俗要道某

拳拳服膺日勸文職實力作興之矣但臺民錮蔽已深
犯亂成習一時未能悉化每有亡命之徒時作死灰復
燃之想邇者林亨李咸陳法等倡亂于南顏烟招誘山
際餘孽鼓煽于北雖經次第就擒奸謀潰敗搜捕山窩
掃清逋讎不意三林地方復有焚汛奪舟之變隨遣舟
師出洋多方追緝復發陸兵前往三林協防以壯聲勢
乃初九夜竹仔腳地方復有賊殺塘兵之事據守備劉
錫報稱風聞奸匪百人旗幟甚多又諸羅令稟摺稱賊

夥在八槳溪小溪洲拜旗而行搶殺塘汎某一面調遣官兵圍搜堵截勦捕一面差人密訪則竹仔腳塘人烟聚集左右共數百家去歲杜君英過此尚須向民假道決非小賊所敢輕造之區而汎塘左右店舖布疋貨物並無搶奪一件亦無戕傷一人獨殺兵丁可疑殊甚旗幟多人之說止據本庄如此傳聞詢之他社皆云未見此可知賊不在遠也果有聚衆拜旗搶殺塘汎則放肆披猖非同小可此等作何聚集從何而來鄉民豈無知

覺並不先事首報及戕塘兵亦無庄鄰救護即曰黃夜
衆寡不敵獨不可尾追蹤跡窺伺去處以報官兵擒捕
此可知人心渙散之故也夫作賊難欺鄉里況嘯聚殺
人是何等事所以不敢首報不敢救護者皆畏獲戾盜
賊暮夜尋仇或如塘兵見殺或以茅舍供賊人之一炬
是以坐視恣行莫懷守望相助之心未經約束團練勢
孤心怯之故也臺地二千餘里即如去歲憲議添設營
汛尚虞地廣兵單有鞭長不及馬腹之患乃兵不增而

反減營不增而反裁較之未亂之先單弱更甚可不為
寒心乎今郡治雖有協防兵二千人足供調遣然計南
路下淡水岡山分去四百有奇北路下加冬半線又分
去四百近者遊擊林秀都司閔威署把總林時葉張天
寶陳雲奇先後帶兵協防北路又分去六百有奇在郡
所存防兵及裁營候補之衆不過千人經制各營又多
分守汎地存營無幾府治關係重大未可遂云兵力有
餘也某不敏以為當今之時宜急訓練鄉壯聯絡村社

以補兵防之所不周家家戶戶無事皆農有事皆兵使盜賊無容身之地所謂急則治其標不可須臾緩者也星星之火或致燎原勿謂無傷其禍將長此時添兵不可增營不可坐觀其敝後悔何及鄙人不識時務權為擅專會商道府檄縣暫行聯絡鄉壯之法以固人心早晚逸賊盡獲地方大定即為撤去仍行鄉約化導設義學以教誨之不知憲臺以為何如重洋遠隔請示維艱總為奠安疆圉起見許我罪我均罔敢辭

東征集卷四

欽定四庫全書

東征集卷五

廣州府知府藍鼎元撰

料三林逸賊逃歸內地請移廣省擒捕書

內山餘孽從三林港焚汎奪舟逸入於海此異事也搜捕迫蹙無地自容鋌鹿險以偷生亦勢所必至耳經遣水師弁兵飛駕哨船分南北二洋追捕杳無蹤跡茲聞其逃入內地在青水溝劫坐商船至銅山洋面又奪坐

小漁舟舍商船去此賊將散夥返家不久處波濤矣銅
洋換舟賊不在遠其歸宿必於潮界大抵樟林東隴鴻
溝澄海之間棄舟登岸決然而無疑者羣賊既為潮人
當於潮州捕之彼以為幸脫網羅不自知其已入鼎鑊
也其黨雖多為三林汛兵殺死之外不過五六十人負
傷半焉有頭傷面傷或手足胸膛創痛危急豈能數日
全愈又從朱一貴叛逆時皆割截髮辮今豈能驟長就
此求之靡不獲矣獲一賊則嚴刑夾訊供招餘黨所在

逐家擒縛無論五六十人即千百不失一也敢請移檄
廣東督撫令潮州鎮道府縣密行各鄉社查緝不旬日
間便可悉數擒獲仍差千把總一員赴潮摧提沿途州
縣營汛多撥兵役防護至閩梟示藁街使民知國法萬
不可逃即天外奔逸重重大海得脫還家尚有平空蹤
跡飛縛之卧榻之內亦足見盜賊不可為而犯亂終膏
斧鑕不若守分安業者之寬然宇宙也則革面革心悔
悟自新之念可以油然而生矣愚人千慮或有一得幸勿

謂迂請嘗試之

論下加冬半線二守備書

下加冬半線添設守備之議既皆不果則北路空虛極矣以八九百里險阻曠遠民番盜賊雜處之邊地而委之北路一營八九百之兵可恃以久安長治乎半線乃宜設縣安頓遊擊之區今縱未能豈可併守備不設乎閒居無事尚且宜議綢繆況今既已亡羊猶不思補牢乎廟廊碩畫非鄙人之所窺測也下加冬署守備李郡

半線署守備林君卿俱皆可用之才今二汛守備既已
不設無令其終于千總之理李郡入臺頗著勞績其志
在安靖地方追奔逐北搜山緝捕殫心竭力不避險艱
且其氣局宏遠非諸將弁可及僅處偏裨之任尚未足
展其所長區區守備一官遂限于命若此耶林君卿以
俸滿千總到省請咨赴部一聞臺警即願軍前効力志
已可嘉大軍征剿北路君卿率外委丁壯人等前驅清
道殺敗賊衆奪賊牛車人馬砲械實為出力防守半線

地方清寧向使君卿俸滿赴部勿事軍前已官守備久矣因茲征臺反滯上進是為國忘軀之士反不如縮頸蝘蛭安坐以遷轉其官非執事所以鼓舞羣材得人死力之道也見今臺鎮水陸各營並無守備員缺可否將李郡林君卿二員即于內地題補或就臺員更換在執事一轉移間耳存公道協人心為地方收得人之效一舉三美某實深有厚望焉減兵移鎮撤去兩中營之檄民間甚為駭然聞姚提軍已經入告不勝手額萬一廷

議未允尚祈執事勿吝封章為民請命望切望切

論蘇榮書

把總蘇榮雖老壯士也大軍進攻鹿耳門榮以小舟從
林亮董方之後賈勇殺入某所親見提軍以其違令擅
進故為裁抑此自軍紀當然蘇榮嗷嗷怨誹以為嫉能
蔽功過矣將令當遵一步不可踰越所以使人赴湯蹈
火無敢弗從提軍派定先鋒榮不在列一旦見敵死生
弗顧鼓棹爭先是違將軍之令也律以擅進之咎榮安

所辭然觀過知仁聖有明訓使榮他事干紀自應迅伏
其辜臨陣見敵似當別論

國家深仁厚澤臺灣安享樂利四十餘年朱一貴無因
叛逆與

國為仇凡有人心罔不切齒爭欲先啖其肉豈容優游
瞻顧稍緩須臾蘇榮忠憤所激不知其他自以出兵已
奉將令便可橫戈直前無袖手旁觀之理矍鑠哉是翁
較之聞鼓聲而縮頸者其賢遠矣榮過甚小情亦可原

止宜裁抑一時不可棄置終身使人人畏威遠罪臨敵以將令為推諉非所以勸先登之士也榮年六十餘精力尚壯使處偏裨之任自足効其所長今併一千總而不得則棄置將終其身矣隙駒已邁來日無多豈堪為此蹉跎哉提軍養重制府憐才可以並行不悖撥雲霧而見青天深於執事有厚望焉某白

論諸弁書

伏讀憲札謂某所爲千總李郡胡廣林君卿三人李郡

既已知之胡廣矜功使氣林君卿縱兵賭博二弁尚待
斟酌軍前千把總可用者再舉數弁備擢可也執事為
地方掄才至詳至慎自必有所風聞但功而矜則衆所
忌胡廣果有矜功同列無不知之諸將弁未言及者武
人氣盛在所不免然未嘗與人鬪爭未嘗虐待士卒及
悻悻不平之意見於顏面則使氣之說似亦未可信也
林君卿小心謹慎營伍頗飭北路距府未遠搜山殄孽
將士雲屯訪事差弁往來絡繹一舉一動某亦無不知

之果有縱兵賭博當在叅劾之科豈有反為推薦之理
大抵世情險薄妬嫉者多鬼蜮含沙何處蔑有惟大君
子不為所動自不待禁而見覲曰消耳南澳鎮左營千
總陳瑞樸實勤謹老成練達臺鎮右營千總倪鴻範才
具優長營務熟諳使居偏裨之任二弁皆綽乎有餘臺
鎮左營把總林三

今改姓名
楊啓忠

人材出衆膽畧亦優出兵

搜捕不遺餘力臺鎮右營把總何期有外拙訥而內明
晰果敢勤慎志操向上二弁再加歷練未能定其所至

也夫人固不易知知人亦不易惟在用之而已璞有玉而沙有金亦必待琢之淘之而後人知其金與玉也諸弁皆待良工以成器則胡廣林君卿終未可以沙石棄之

論周彩書

連江營把總周彩勤謹歷練去夏隨師征臺著有勞績秋冬撥防岡山正值南路癘疫盛行之際各營征兵多畏死憚行幾千軍紀獨彩毅然前驅為士卒倡深可嘉

也繼擢補岡山千總以家貧累重辭情願仍居把總勞
苦趨公每從都司閔威于南北二路搜捕山谷不避險
艱乃實在出力之員凡事向前無少推托者也今地方
事定令其班師回營倘內地有千總員缺可以超拔之
處伏祈勿吝優擢示鼓勵焉某庸劣下材謬膺海外重
寄所賴行間將士協心宣力共效愚忠方得疆圉寧謐
而各處出力弁兵惟搜山為最苦風餐露宿雨浸炎蒸
所歷之地又皆層崖密箐鳥道羊腸登高則攀藤如懸

于壁下險則滾落如墜于淵今年三四五月北方采入其阻兵丁或迷失道或跌入坑澗蟲蛇螞蟥吮嘍至死言之可為痛心某恨無厚賞酬庸不得人人而加之官爵乃至裁缺候補弁目於營制幸復之後亦不能使沾實職少報其出生入死之勞真覺面慙耳熱赧赧然不欲與吏士相見也今各營弁缺安頓已定無用多言尚冀留心內地將臺中奉裁候補現在軍前勞勩之弁陸續補還以慰衆望某非有所私不過欲使長征士卒共

服憲臺公道耳請先優擢周彩以為之標可也

論蔡奕陳祥送考軍前并缺書

蔡奕陳祥南灣目兵也某由南灣鎮總統大軍克復臺
灣奕與祥隨征出力乃給外委把總累加至守備職銜
是軍前用命勞績顯著者也奕在軍最為勤謹日夜巡
防無一刻之暇祥從某在溫州屢次跳船擒獲洋盜孫
森等輩今又撫杜君英擒韓淵雖狀貌不偉而才畧可
用並經先後備形薦牘言之詳矣春間以鴻標把總黃

喜軍前病故員缺特將蔡奕陳祥申送考驗拔一頂補以領灣兵之征臺者于三月內遠涉重洋奔馳至省則提軍以某咨文為不可用駁令千里往灣另懇署鎮文書遂使二人流離落魄空勞往返跋涉數千里匍匐而之南灣延今已五越月矣灣中遊守拘牽陋例弗肯備文申鎮不知鎮文何時到廈又不知廈咨何時到憲陳蔡功名終屬子虛所以仄軍前將士之心墮豪傑立功之志非淺鮮也夫以南灣征臺目兵補南灣征臺把總

已無可議況以軍前病故之缺補軍前用命之人有何不合條例之處且征兵係某總統二千協防之兵又復付某鈐轄有犯軍紀則操三尺以繩其後今以送考弁目細故尚薄其文書為不足憑則某既不得預爵人賞人之舉有何面目欲以刑人殺人彈壓地方是軍前事俱必受權于內地原營自今以後凡有干犯軍紀應移內地懲究某不得過而問矣提軍儒雅名帥素曉將兵未必膠固至此大抵書吏不遂願欲所為某一人薄

面無足重輕但恐呼應不靈有悞地方大事不得不縷述於執事之前惟望稍為主持以鼓舞而作興之使軍士有所觀感奮勵立功則高厚深仁邊陲共戴不獨身受者銘勒心腑也今西藏用兵軍前拔補弁目果有遙聽內地原營作主務必匍匐數千里來換文書則某其何說之辭

論臺中時事書

臺中時事有大可慮者三米貴兵單各官窮蹙政務懈

散而又將有移鎮澎湖之舉是合之而四矣近日斗米
賣錢三百某不自度量移檄道府借動倉穀三萬石減
價平糶當事者難之某以民心皇皇不可遲緩倘上臺
督責則某一人獨償於是道府發奮共肩其任已經舉
行民情稍慰併檄諸羅令開倉勸庄戶出陳易新嚴禁
囤積及商船透越諸弊北路訛言未息諸羅營縣請兵
協防隨遣把總林時葉陳雲奇張天寶領兵三百於是
月初三日協防去矣北路地方千里深山曠野處處賊

窠即再添設一營尚苦鞭長不及今一兵不增又欲調離其鎮于數百里海外之澎湖是直委而去之豈但如累卵之危乎此時移鎮未行又有協防兵二千足資調遣然外九庄笨港以上盜賊頻聞皆距汛防寫遠巡察不及加以野番出沒亦須防閑秋成尚早人心易動種種情形已如抱火復慮協防之兵尚非長久之計恐議者謂臺平無事可以撤回則焦頭爛額將有大不可言者邇者臺地各官多以五日京兆不肯盡心竭力任地

方安危之寄高守不敢思歸又以戰船賠累惟無米之
炊是急心灰氣憤以脫然廢棄為幸何能有餘力整
頓地方臺道各縣強忍不敢言貧九營將弁人人有救
口不贍之嘆此真孤掌難鳴一事不可為之秋也夫官
人于遐荒異域而絕其養廉之資使枵腹為

國家辦事幸時際隆平不過空乏其身脫有一方草動
呼應莫靈惟有坐以待斃而已矣鄙意前人官庄宜酌
量大小衙門留還少許俾足養廉之用畧加饒裕以備

不虞今悉數歸公使各官窮蹙至此豈所謂地方之福乎

國家四海之富不在區區增益數萬之銀錢一旦有悞封疆即費百萬之錢糧而不足及今檄令開墾如北路林壠埔竹塹埔可闢良田十數萬畝即於此內再創官庄尚可補救將來免生番殺人之患而執事又有劃界避番之說則亦末如之何矣鳳山令不肯植柵為城亦以巧炊藉口某于道府之前痛切言之已許可矣此雖

小事但營縣無遮欄如人家無門戶行道皆得眩篋而去折柳樊園足禦狂夫未可以為微而忽之也某小才任重時事關心苦無將伯之助非孜孜為地方各官謀口腹身家之計又未知移澎一節雖經提軍入告可得挽回與否目前艱鉅雖黽勉不敢告勞移澎之後天各一方此間治亂情形非某所能逆料矣言詞絮聒繁冗無緒惟執事之急為維持之也

論擒獲奸匪便宜書

臺民喜亂如撲燈之蛾死者在前投者不已其亦可憐甚矣前月遣兵搜捕北埔寮諸山及諸羅縣令北路將弁差委弁員人等先後擒獲劇賊李慶黃潛蘇齊等四十餘人本擬即于軍前竿首藁街以儆無賴道府以地方既平欲行善事效古人死中求生得情哀矜之意備叙供由解回內地聽臬司審擬分別正法某以為非靖亂之道但意在文武和衷不得不委曲從衆竊心疑此間莠民將有輕視法網謂叛逆可以從寬不妨復嘗試

者兩月以來夜不能寐密差弁員四處偵訪果有奸民
鄭仕綽號急燒疎布散訛言招集亡命謀于六月初一
夜豎旗縱火燔文武衙署抄掠市肆是日大雨連宵各
自散逃某聞知捕治併其黨蕭興祖李柯等供認不諱
復會委臺灣令周鍾瑄搜捕鄭仕家窩黨獲其檔冊會
同道府質訊則冊中開列偽爵人數黨羽數萬人一時
百姓旁觀多有駭愕狀周令恐牽連者衆民心驚惶密
白道府將偽冊當堂焚燬某大敬服其能即令燒去鄭

仕等情罪既確死有餘辜立斃之庭以彰國法以快人心從此匪類廓清諒無復作孽求死者矣但副將徐左柱已經至臺某當遵

旨赴澎湖駐劄既行之後則非所知應否諭令徐副將凡事少加斷決不必拘牽文義以長奸頑則在執事稍假之便宜非某所敢饒舌也

論復設營汛書

臺兵宜增而不宜減營宜增而不宜裁某向者言之再

三不啻賈生慟哭今乃有復舊之日耶

當寧聖明苞桑永鞏可手額相慶賀矣月之初十日接
部文總兵仍舊駐臺水陸兩中營悉還舊制併將道標
弁兵裁歸鎮轄安設南北二路適中要緊之處十八日
復准提軍咨移將道標守備撥歸右營令帶把總一員
兵二百四十名駐防岡山道標千總撥歸左營令帶兵
一百二十名駐防下加冬水師協營撥千總一員帶兵
一百五十名駐防笨港把總一員兵一百二十名駐防

鹽水港可謂佈置極善但某愚見猶願竊有請也岡山雖起亂之所然不如羅漢門要害鄙意欲將守備弁兵安設羅漢內門以扼南中二路之吭上可控制大武壠下可彈壓岡山東可斷賊人巢穴生番出路西可絕猴洞口舊社紅毛寮之退步於形勝甚得扼塞使鳳諸盜賊不能相通往來正合廷議所謂適中要緊之處詢之南路陳叅將所見不約而同今提軍欲安頓岡山尚屬治末而未及本之論執事似當細為裁酌之下加冬笨

港鹽水港三處安設至當不易但某愚見尚以臺北地方千里防汛虛半線鹿子港諸處提軍並未籌及半線乃宜設縣安頓遊擊之區今縱未能亦豈可遂置度外將謂協防暫駐之兵可長恃乎鄙意水師既復三營似可徑撥一營在外以為犄角不必蟻聚安平將左營遊擊帶兵船駐劄鹿子港兼顧半線就撥千總把總帶目兵分防笨港鹽水港餘港汛皆仍其舊總自蚊港以上直至淡水營交界皆聽鹿子港遊擊管轄則臺北沿

海一帶可以無憂可以補北路陸營兵力之所不及無
千里空虛之患不知執事以為何如耳夫地非親歷未
免扣槃疑鐘拘墟一隅遺忘全局非經國安邊之道也
水師中營少守備一員則提標前營千總陳啓俸水務
熟諳樸誠勤謹堪以補用近護送侍御吳公來臺鹿耳
門陡遇惡風斬旋吊舵而入

欽差得以無恙是其見效之一徵同日同到之船不能
收入或飄至打狗即矯擊碎或飄至山後蛤仔難擊碎

毫釐之差千里之謬可知水師全在諳練不比內地可以苟且也陸營少千總一員把總三員水師少千總二員把總四員臺中裁缺千總多已調回當于內地另行選擇把總則余青周宣張天寶吳得功蘇思維林福林時葉等七弁皆人地相宜堪以補用有益地方可無俟他求耳某疎庸眇識總為海外莫安起見憑臆妄談不必其言之可採惟執事留心區畫則幸甚

與朱叅戎札

通者北路地方竊劫之盜盛行足下亦曾知之乎大坵
田朱曉庄方遭其毒今笨港社尾又見告矣僕遠隔百
餘里某夜疎失某家亦已訪知甚悉禍衷急性不能袖
手旁觀足下身在地方乃故作寬弘大度若為不見不
聞也者諒匪類俱必深感厚恩怨鄙人之苛刻也開春
未及匝月行劫已十數處十數處大盜未聞獲一不知
防是汛者所司何事居汛防之上者所司更何事也足
下試一振刷使貴屬備弁以開場放賭之智為搜緝奸

匪之謀地方何患不寧謐乎僕暫留彈壓班師有期五日京兆越俎徒嗤諸君亦以其為過客也而言者唇焦聽者耳聾不思熒熒之火或致炎崑涓涓細流將成巨浸況茲叛亂甫平野心未泯尤當防微杜漸遏孽初萌既可聚黨數十人操械行劫晏然莫敢過問則由此擴而充之夫亦何事不可為恐我行之後諸君將悔而噬臍無及耳恢復此邦談何容易若復掩耳閉目坐觀其敝諒有人心者斷不出此敢祈足下略飭備弁將十數

處行劫之賊稍緝一二以塞我願地方之福諸君躬坐而享之於僕無所預焉不然僕亦無如諸君何惟有備叙歷次詳悉咨呈制軍應否用恩用威聽其裁酌而已恃在至愛特此相聞顒望回音曷勝翹切

與林遊戎札

臺北餘孽未淨而足下遽爾思歸僕竊以為舛矣足下欲以北路餘燼誣之本汎文武員弁託為軍士久羈跋涉含嘆怨言等語是將以愚僕耶僕思足下膽略素優

忠勤有志而今乃若此謂協防官兵無地方責任應高坐以遨遊乎抑北路叅將舍子他求尚有憤愠未能自釋者故存匠心欲觀其敝也夫食人之祿忠人之事足下身為

朝廷職官自當瘁躬報國無分畛域豈可以童孺婦女之見搖軍中吏士之心此僕所大不解者足下以為無與己事則固儼然提標尊貴之員曷不高坐鷺江而必遠泛重洋與僕共事於此即僕統師征臺臺郡既復可

以振旅回澗而亦必久留彈壓以迄今茲可知此中均有不能自便者也軍士久役僕寧獨非人情但足下北行方十餘日三林竹仔腳兩處大盜未聞足下報獲一賊拔賊一毛較昔人役久不用歷三時而後還相去正自有間足下素能拊循士卒善得軍心何至數日之間輒來含嘆又復敢有怨言將無足下將兵亦有不能十分善馭之處耶僕雖庸劣不才弗克恩施軍士豈忍聽其久役興嗟不為更迭輪換應否一二月為期遣發目

兵前往換防僕胸中自有主宰足下靜而聽之可矣倘
足下必恃功固執未忘觖望叅將之心僕亦不敢相強
去來悉依尊便苟軍紀而可廢於足下復何尤哉僕知
足下婉孌新好妬寵爭憐實在衷情難割但丈夫以身
許

國亦難常遂燕私來日正長暫煩忍耐勉之勉之

諭閩粵民人

鄭章毆死賴君奏賴以槐按問抵償聞汝等漳泉百姓

以鄭章兄弟眷屬被殺被辱復仇為義鄉情縫紼其憐其死本鎮豈非漳人豈無桑梓之念道府為民父母豈忍鄭章無辜受屈但賴君奏賴以槐果有殺害鄭章兄弟家屬應告官究償無擅自撲殺之理乃文武衙門未見鄭章片紙告愬而賴家兩命忽遭克手雖欲以復仇之義相寬不可得已況賴君奏等建立

大清旗號以拒朱一貴諸賊乃

朝廷義民非聚衆為盜者比鄭章擅殺義民律以國法

罪在不赦汝等漳泉百姓但知漳泉是親客庄居民又
但知客民是親自本鎮道府視之則均是臺灣百姓均
是治下子民有善必賞有惡必誅未嘗有輕重厚薄之
異即在汝等客民與漳泉各處之人同自內地出來同
屬天涯海外離鄉背井之客為貧所驅彼此同痛幸得
同居一郡正宜相愛相親何苦無故妄生嫌隙以致相
仇相怨互相戕賊本鎮每念及此輒為汝等寒心今與
汝民約從前之事盡付逝流一槩勿論以後不許再分

黨羽再尋仇讐各釋前怨共敦新好為盛世之良民或有言語爭競則投明鄉保耆老據理勸息庶幾興仁興讓之風敢有攘奪鬪毆負嵎肆橫本鎮執法創懲決不一毫假借其或操戈動衆相攻殺者以謀逆論罪鄉保耆老管事人等一併從重究處汝等縱無良心寧獨不畏刑戮本鎮以殺止殺無非為汝等綏靖地方便各安生樂業速宜凜遵無貽後悔

東征集卷五

欽定四庫全書

東征集卷六

廣州府知府藍鼎元撰

紀十八重溪示諸將弁

十八重溪在哆囉嘓之東去諸羅邑治五十里乃一溪曲折繞道跋涉十八重間有一二支流附入非十八條溪水橫流而過也其中為大埔庄土頗寬曠旁附以溪背員潭坎下北勢楓樹岡等小村落未亂時人烟差盛

今居民七十九家計二百五十七人多潮籍無土著或有漳泉人雜其間猶未及十分之一也中有女眷者一人年六十以上者六人十六以下者無一人皆丁壯力農無妻室無老者幼穉其田共三十二甲視內地三百六十餘畝亦據報聞無核實清丈本哆囉囑社番之業武舉李貞鐫代番納社餉招客民墾之者也自諸羅邑治出郭南行二十五里至楓子林皆坦道稍過則為山蹊十里至番子嶺嶺下為一重溪仄逕紆迴連涉十五

重溪則至大埔庄四面大山環繞人跡至此止矣東南有一小路行二十五里至南寮可通大武壠高嶺陡絕由大山峭壁而上壁間鑿小洞可容足如登梯然行者以手攀樹藤足踏洞窩甚險北路山寇捕急每從此遁大武壠通羅漢門阿猴林而為南中二路之患今下加冬署守備李郡奉憲檄塞山蹊掘去足窩斷藤伐樹道阻不可行也夫遏姦宄靖地方在人不在險藤生樹長而後保無有開闢鳥道者亦不可知似當加之經理使

凡茲人民皆有室家田宅之係累即孔道猶重關耳斯地故逋逃數深僻宜防範恐或勞我軍過此諸將弁識之

紀虎尾溪

虎尾溪濁水沸騰頗有黃河遺意特大小不同耳黃河多紅泥翻波其水赤虎尾則粉沙漾流水色如葭灰中間螺紋旋繞細膩明晰甚可愛大類澎湖文石然溪底皆浮沙無實土行者須疾趨乃可過稍駐足則沙沒其

脛頃刻及腹至胸以上則數人拉之不能起遂滅頂矣
溪水深二三尺不通舟夏秋潦漲有竟月不能渡者余
以辛丑秋初巡斗六門而北將之半線至溪岸稍坐令
人馬皆少休已而揚鞭疾馳水半馬腹車牛皆騰躍而
過亦奇景也溪源出水沙連合貓丹蠻蠻之濁流為濁
水溪從牛相觸二山間流下北分為東螺溪又南匯阿
拔泉之流為西螺溪阿拔泉溪發源阿里山過竹腳寮
山為阿拔泉渡西入于虎尾四溪牽合雜錯而清濁分

明虎尾純濁阿拔泉純清惟東螺清濁不定且沙土壅
決盈涸無常吾友阮子章詩云去年虎尾寬今年虎尾
隘去年東螺乾今年東螺澮又云餘流附入阿拔泉虎
尾之名猶相沿亦可以知諸溪之大槩矣虎尾溪天然
劃塹竊謂諸羅以北至此可止宜添設一縣于半線自
虎尾以上至淡水大雞籠山後七八百里歸半線新縣
管轄然後北路不至空虛無地廣兵單之患吏治民生
大有裨補不知當局可有同心否政予望之

紀水沙連

自丰六門沿山入過牛相觸溯濁水溪之源翼日可至
水沙連內山山有蠻蠻猫丹等十社控弦千計皆鷙悍
未甚馴良王化所敷羈縻勿絕而已水沙連嶼在深潭
之中小山如贅疣浮游水面其水四周大山山外溪流
包絡自山口入匯為潭潭廣八九里環可二三十里中
間突起一嶼山青水綠四顧蒼茫竹樹參差雲飛鳥語
古稱蓬瀛不是過也番繞嶼為屋以居極稠密獨虛其

中為山頭如人露頂然頂寬平甚可愛詢其虛中之故
老番言自昔禁忌相傳山頂為屋則社有大災是以不
敢嶼無田岸多蔓草番取竹木結為桴架水上藉草承
土以耕遂種禾稻謂之浮田水深魚肥且繁多番不用
罾罟駕蟒甲挾弓矢射之須臾盈筐發家藏美酒夫妻
子女大嚼高歌洵不知帝力於何有矣蟒甲番舟名剗
獨木為之划雙槳以濟大者可容十餘人小者三五人
環嶼皆水無陸路出入胥用蟒甲外人欲詣其社必舉

草火以烟起為號則番刺鱗甲以迎不然不能至也嗟
乎萬山之內有如此水大水之中有此勝地浮田自食
鱗甲往來仇池公安足道哉武陵人誤入桃源余曩者
嘗疑其誕以水沙連觀之信彭澤之非欺我也但番人
服教未深必時挾軍士以來遊於情弗暢且恐山靈笑
我所望當局諸君子修德化以淪浹其肌膚使人人皆
得宴遊焉則不獨余之幸也已水沙連內山產土茶色
綠如松蘿味甚清冽能解暑毒消腹脹亦佳品云

紀竹塹埔

竹塹埔寬長百里行竟日無人烟野番出沒伏草莽以
伺殺人割首級剝髑髏飾金誇為奇貨由來舊矣行人
將過此必倩熟番挾弓矢為護衛然後敢行亦間有失
事者以此視為畏途然郡城淡水上下必經之地不能
舍竹塹而他之雖甚苦亦不得不行云其地平坦極膏
腴野水縱橫處處病涉俗所謂九十九溪者以為溝澮
闢田疇可得良田數千頃歲增民穀數十萬臺北民生

之大利又無以加于此然地廣無人野番出沒必碁置村落設營汛奠民居而後及農畝當事者往往難之是以至今棄為民害不知此地終不可棄恢恢郡邑之規模當半線淡水之中間又為往來孔道衝要即使半線設縣距竹塹尚二百四十里不二十年此處又將作縣流移開墾日增日衆再二十年淡水八里坌又將作縣氣運將開非人力所能遏抑必當因其勢而利導之以百里膏腴天地自然之樂利而憚煩棄置為百姓首額

疾蹙之區不知當事者於心安否也有官吏有兵防則民就壘如歸市立致萬家不召自來而番害亦不待驅而自息矣天下無難為之事止難得有心之人竹塹經營中才可辦曾莫肯一為議及聽野番之戕害生民而弗恤豈盡皆有胸無心抑中才亦難得若是乎大抵當路大人末由至此故不能知而至此者雖知而不能言之故也留心經濟之君子當不以余言為河漢夫

紀火山

海山奇聞何所不有吾以耳目之所及為憑其不及者
多矣山生火說近荒唐火出自水中尤荒唐之甚者也
雖然固有之臺灣火山有二焉皆諸羅縣境內一在半
線以北

半線今為彰化縣

貓羅貓霧二山之東晝常有烟夜有

光生番所宅人跡莫至吾聞其語而已一在邑治以南
左臂玉紫山之後小山屹然下有石罅流泉滾滾亂石
間火出水中無烟而有焰焰騰騰高三四尺晝夜皆然
試以草木投其中則烟頻起焰益烈頃刻之間所投皆

為灰燼矣其石黝然堅不可破石旁土俱燃焦其堅亦
類石信宇宙之奇觀也於戲天下事之不可解非尋常
所能測度類如斯已未嘗經目見耳聞自以為予智莫
己若直夏蟲不足與語冰耳君子所以嘆學問無窮而
致知格物之功又當兼閱歷驗之也

紀荷包嶼

辛丑秋余巡臺北從半線遵海而歸至猴樹港以南平
原廣野一望無際忽田間瀦水為湖周可二十里水中

洲渚昂然可容小城郭居民不知幾何家甚愛之問何
所興夫曰荷包嶼大潭也淋雨時鹿仔草大檳榔坑埔
之水注大潭中流出朱曉陂亦與土地公港會大旱不
涸捕魚者日百餘人洲中村落即名荷包嶼庄時斜陽
向山驅車疾走未暇細為攬勝然心焉數之矣水沙連
潭中浮嶼與斯彷彿惜彼在萬山中為番雛所私有不
得與百姓同之未若斯之原田黼黼聽民往來耕鑿結
廬棲舍於其間而熙熙相樂也余生平有山水癖每當

茂林澗谷奇峰怪石清溪廣湖輒徘徊不忍去慨然有
家焉之想而吾鄉山谷幽深崇巒疊嶂甲于天下所不
足者河湖耳是以余之樂水更甚於樂山而過杭州則
悅西湖過惠州又悅西湖入臺以來則悅水沙連杭州
繁華之地惠州亦無曠土水沙連又在番山皆不得遂
吾結廬之願如荷包嶼者其庶乎建村落于嶼中四面
皆水環水皆田艤舟古樹之陰即在羲皇以上釣魚射
獵無所不可奚事遂遂於風塵勞攘間哉所恨千里重

洋僻在海外不得常觀光上國恐子孫渺見寡聞如夜郎之但知自大是則可憂也姑紀之以志不忘焉

紀臺灣山後崇文八社

北路擒賊黃來混稱臺灣山後尚有餘孽三千人皆長髮執械屯聚山窩耕田食力明知其謬亦遣弁員往視之併記其地里情狀以來雖未可信其確無訛舛亦足

跡不到之一圖籍也山後有崇文八社

康熙三十四年賴科等招撫歸

附原是九社因水輦一社數年前遭疫沒盡今虛無人是以此止有八社

東跨汪洋大海在

崇山峻嶺之中其間密箐深林巖溪窮谷高峯萬疊道路不通土番分族八社曰葯榔榔曰斗難曰竹脚宣曰薄薄為上四社曰芝武蘭曰機密曰猫丹曰丹朗為下四社八社之番黑齒紋身野居草食皮衣革帶不種桑田其地所產有鹿麝野黍薯芋之屬番人終歲倚賴他無有焉自古以來人跡不到康熙三十二年有陳文林侃等商舶遭風飄至其處住居經年畧知番語始能悉其港道於是大雞籠通事賴科潘冬等前往招撫遂皆

嚮化附阿里山輸餉

八社與阿里山社合輸餉銀一百五十五兩二錢三分二厘 每

歲贖社之人用小舟裝載布烟鹽糖鍋釜農具往與貿

易番以鹿脯筋皮市之皆以物交物不用銀錢一年止

一往返云其郡治水程由安平鎮大港出口沿海邊而

行喜西北風歷鳳山打狗西溪東港大崑麓加六堂風

港郎嬌至沙馬磯頭水道一十二更又向東轉行山背

當用南風過蟬卒老佛大紫高蕭馬間卑南覓山外水

道十更復至薄辦社水道三更此皆鳳山縣界也沿海

北向直至崇文之石門港口水道九更港內溪灘水急
須待天清氣朗風平浪靜用土番牽纜上灘入于大溪
寓灣而大舟不得達焉於是山道灣進芝武蘭又三
百里至機密又九十里至猫丹五十餘里至丹朗四社
熟番共二百四十餘家就歸附納餉者言則近水沙連內山矣
至欲往上四社須從原路復出下灘往北駕駛水道二
更方至筠榔榔社二十餘里至斗難社又四十餘里至竹
脚宣又二十餘里至薄薄社四社熟番共二百三十餘

家其生番散處深谷不受教化者則不得而考矣東北

山外悉皆大海又當從水道沿山歷哆囉猴猴始到蛤

仔難

蛤仔難三十六社與三朝山雞籠相近

水道二十一更南路船無有

過者惟淡水社船由大雞籠三朝而至云嗟乎天下事

非躬親目覩未免揣籥疑鐘今茲所云豈可盡信水道

太遠不無虛張但山後險阻情勢大畧不過如此與余

平昔所聞十九昭合則姑存其論可也曩者南路擒賊

鄭固亦稱王忠逃匿山後大湖有黨千人經遣弁賁檄

往卑南覓諭大土官文結鼓舞七十二社土番遍山搜捕並無逸賊及漢人蹤跡惟崇文八社未至今崇文以內如此奸匪安得有容身之地乎但臺灣海外巖疆五方雜處雖時際隆平不能保百年無事將來匪類窮蹙必以山後為避兵之所當局者識之

覆臺變殉難十六員看語

看得臺灣土賊來一貴等倡亂陷沒全臺武職自總兵官以下把總以上死事各員所處之地不同所以死者

亦異臺協水師如副將許雲左營遊擊游崇功此身在水師事起陸路領兵救援鄰境而血戰捐軀者也如中營把總李茂吉則隨許副將救援力戰被執不屈罵賊而死者也如中營千總林文煌右營千總趙奇奉則隨許副將救援在陣戰亡而文煌又與其弟文甲俱亡者也如汀州鎮中營把總石琳則帶領班兵到臺遭亂赴敵而力戰陣亡者也如北路營叅將羅萬倉則鄰境寇來無城可據而血戰捐軀併其妾蔣氏守義自縊者也

如臺鎮總兵官歐陽凱鎮標左營守備胡忠義中營千
總蔣子龍把總林彥此倉猝禦敵在陣戰亡而左營千
總陳元則先於赤山殺賊力戰身亡者也如南路營守
備馬定國把總林富此身在地方變起倉猝而林富則
在陣戰亡馬定國則戰敗自刎者也如鎮標左營遊擊
孫文元則奔至鹿耳門赴海而死者也如南路營叅將
苗景龍則身在地方備禦無術倉皇戰敗逃匿萬丹港
漁廬三日賊執而殺之者也以上一十六員或勇赴關

而死於忠或寇臨境而死於義或事已壞而死於勢惟
苗叅將稍滋口實餘皆捐軀報

國不為苟且偷生有殉封疆無虧臣節職等研訊親屬
証見人等其被害情形月日亦既歷歷有據并據各具
供結前來並非影響傳會應請特疏

題旌分別贈秩優卹襲廕以慰海外幽魂作忠貞義烈
之氣使千秋將士咸知沙場馬革為人生莫大之寵榮
有功世教不淺矣

覆臺變逃回澎湖押發軍前効力奉叅解任十六

員看語

看得臺灣亂賊朱一貴等攻陷臺府鎮協戰死郊垌弁
兵膏塗原野奉叅遊擊周應龍張彥賢等以下一十六
員有戰敗而逃者有未嘗戰而逃者有病不能戰而逃
者有自外汛調回無及于戰而逃者所以逃之故不同
及其効力立功則一也戰敗而逃為臺鎮右營遊擊周
應龍道標守備王國祥千總許自重臺協中營把總李

碩碩之戰在南路赤山被傷奔府府陷不能再戰遂奔舟自重之戰在南教場敗走海邊遇萬守備哨船救載國祥帶兵在臺鎮軍前往來督守被賊衝散投奔道船應龍之戰在岡山捕賊逗留不進及劄二濫縱番兵淫殺焚掠民不堪命附賊始多賊復號召豎旗環攻南路營應龍戰敗被傷奔回臺府賊隨之至府亦繼陷遂奔內地直至泉州其未嘗戰而逃者為臺協水師中營遊擊張彥賢守備凌進左營守備萬奏平右營遊擊王鼎

守備楊進千總朱明皆身在船中並無打仗見賊陷郡
揚帆逃出水師中營千總劉清帶兵三十名鯤身伏路
右營把總鄭耀自打狗港調回協同劉清伏路皆未赴
敵見張彥賢等俱去相率隨之其病不能戰而逃者為
水師左營把總陳福右營把總尹成二人皆血疾在先
給假醫治及賊陷府不能打仗家丁方清吳麟進仔等
扶去舟中跟踪逃入澎湖其自外汎調回無及于戰者
為水師中營把總牛龍左營把總陳奇通奇通從笨港

汎奉調帶兵船二隻于初三日到鹿耳門則賊已陷府
據安平鎮力不能敵收歸澎湖兵船器械無失牛龍分
防蚊港五月初一日奉調離汎初二日至鹿耳門見府
已陷不敢深入將所領兵船一隻駕回澎湖此十六員
逃澎湖之大槩也至于隨師征臺効力立功則周應龍張
彥賢王鼎楊進凌進萬奏平王國祥朱明劉清鄭耀李
碩陳奇通陳福尹成等十四員共集親丁一百八人駕
船二隻于六月十六日隨大軍攻入鹿耳門安平鎮擒

斬賊夥蔡迎陳喜陳平周富曾平楊奎等六名十七十九兩日俱在鯤身打仗二十三日同入臺灣府治二十八日復隨軍往大穆降殺賊牛龍從守備魏大猷許自重從叅將王萬化俱于十六日同入鹿耳門復安平鎮龍持火罐燒賊船自重擒賊鄭氣十七十九等日俱在鯤身打仗二十一夜復隨大軍由西港仔登岸在蘇厝甲竿寮地方大敗賊衆二十三日同入府治此十六員効力立功之大槩也按其功則十四員同舟同隊同行

同止未嘗有功多功少之異牛許二員亦如一轍焉按
其罪則周應龍為重雖有逐隊入臺之功未贖玩寇殃
民喪師棄地潛逃之惡而張彥賢王鼎萬奏平凌進楊
進朱明等次之六員皆水師將弁其協主許副將力戰
至死何以袖手旁觀不交一陣今乃能捨命赴敵共建
勲猷何其怯于前而勇于後也則功固有而罪亦不可
恕也王國祥許自重戰而不勝劉清鄭耀帶兵僅三十
人伏路鯢身而未嘗見敵薄乎云爾李碩先戰傷就醫

後乃扶傷偕遁陳福尹成抱病先經數月情似皆有可
原至牛龍陳奇通遠汎調回在郡陷越日之後赴澎湖
救則又難以必死責之矣茲皆隨師戮力罔憚勤勞似
可仰邀原宥補過論功如牛陳二弁或還其官餘人或
待不死是則

聖朝寬大之恩而亦憲臺再造生成之德非職等所敢
擅議者也

覆臺變在事武職四十一員看語

臺灣遭朱一貴之亂全郡陷沒在事武職大小七十餘員或血戰捐軀或逃歸澎湖或顛沛賊中馳驅險難行徑不一除陣亡殉難十六員勘結請旌奉叅逃回澎湖押發軍前効力十六員另案審覆尚有坎陷在臺未分黑白如遊擊劉得紫等以下四十一員既已奉憲行查不可不逐一確勘情形俾無遺漏者也鎮標中營遊擊劉得紫當賊寇披猖血戰用命及力竭被執抗節不移求埋前鎮屍身從容受刃賊亦義而不殺羈禁學宮朱

子祠七日水漿不入口後聞諸賊皆烏合可破乃聽士民勸進粥食延性命以待王師被禁五十餘日堅貞不變可謂疾風之勁草板蕩之忠臣應請特疏題旌以勵千秋志節而況大兵入臺得紫多募丁壯隨師勦平北路大穆降之捷溝尾庄之勞其功亦有足紀者乎鎮標中營守備張成力戰被傷為賊所執中夜自經二次繩斷不得死賊亦憐之聽兵丁林張保釋匿方賦家中五十餘日大師入臺則大穆降溝尾庄二處與有勞焉北

路營千總陳徽把總鄭高則兵敗各帶重傷行遯復能
糾合鄉勇攻諸羅于大兵未至之先斬賴元改頭祭羅
叅將可謂壯矣雖為翁飛虎江國論所敗仍舊退走入
山然及王師北指皆隨大軍撫賊曾賢李德則二弁之
無受偽可徵也北路營左哨千總龔捷則自八里岔奉
調回營中途遇賊四起遁入北投社鼓舞番衆招集難
民為兵據守殺賊後又協保半線迎師大肚有押運軍
需奔走接濟之勞北路營把總吳德光則兵寡戰敗赴

淡水營請援隨引兵據守南崁復同援淡大師至半線駐防鎮標右營千總馬雲驥則戰敗棄馬夜行晝伏至十八重溪與許興吳林朋等糾募鄉勇八百人豎

大清旗號據險守隘以待援師復隨大軍在大穆降戰勝則三弁之無受偽而有效力可徵也海壇鎮標左營把總李信則帶領班兵到臺經于四月二十二日換回登舟值賊竊發前鎮檄留軍前血戰遍體重傷雜在死屍之內其妹夫王宋收埋裏去得活大兵入臺三閱月

醫治方愈該弁無汛守地方之責有冒死血刃之戰其
無從賊又不問可知也海壇鎮標右營把總陳宋亦帶
領班兵到臺戰敗被傷望門投匿欲薙髮為僧因魁偉
多髭僧不納避難數家皆有實據鎮標右營把總吳益
先從周應龍在南路赤山戰傷奔府府陷為賊所擒迫
使服官不受幸與中營劉遊擊同禁朱子祠得不辱後
隨師在大穆降殺賊得勝南路營把總張文學身在地
方三戰三北為賊所擒亦與中營劉遊擊同在禁中六

日不屈踰牆夜遁往獅子巖為僧大師入臺集義民四百餘人隨軍効力復召回舊兵四百人巡防搜捕鎮標中營把總周應遂在南路赤山戰傷被擒繫縲牛車於春牛埔陣上遇陳宋救回及府陷往黃蘗寺為僧在寺中密製

大清旗與千總康朝功把總李先春韓勝等謀為內應事洩奔逃後隨師大穆降擊賊及北路安撫客庄鎮標左營把總李先春戰傷被擒不降獸醫魏本忠保之得

釋與黃蘗寺謀內應不果後隨軍大穆降殺賊北路中路皆有奔走効勞臺協水師右營把總韓勝戰敗負傷逃匿潛與黃蘗寺謀內應不果大師復臺率親丁張紹奔赴紹為賊追殺勝亦被傷入海中路北路皆隨師奔走効勞淡水營俸滿千總何太武先于二月內離營給咨文赴廈因病稽遲及府陷削髮為僧與黃蘗寺謀內應不果及投大師亦有奔馳押運之勞北路營把總王有才帶兵守隘為賊所執縛去水窟頭黃趙賴承店中

有私釋其縛者縱使行遯匿大排竹民家鎮標中營把總王道隆左營把總陳雲南路營把總陳有祥皆戰傷避匿民舍及投大師道隆招賊蔡鎮一名與陳雲同在大穆降殺賊有祥奔馳南北路獲賊吳亞一名鎮標右營把總李貞先于三月內嘔血給假醫治及賊陷府伏枕奄奄至今尚病危不起則諸弁之無從賊亦可知也金門鎮標右營千總康朝功帶領班兵到臺戰敗被傷雜死屍以免及府陷為賊所擒賂賊兄戴顯得釋入黃

藥寺為僧與周應遂等謀內應事洩逃匿破柙六日僧
寄淵密送飯食得不死或有言其在戴穆轅門服職審
無實據而黃藥內應之謀則其事甚真果有從賊服職
何必為僧即曰戴穆殺後何非戴穆而潛身破柙與死
為鄰終隨大師在大穆降殺賊得勝則該弁亦確無受
偽而有馳驅効力之據者也鎮標左營把總許陞右營
把總黃陞賊至先遁並無接戰及大師平臺大穆降之
役皆有與焉鎮標右營千總李由戰敗逃散至六月二

十八日出投大師或有言其從賊服役而李由堅不招承且云有沈堯巫三元可証則蹤跡未可定也道標把總陳喜或有言其在林曹處辦事而該弁則供為林曹所獲僧寂興保之得免則蹤跡未可定也南路營千總阮欽據供亦有戰傷亦無從賊且有擒獲賊首顏子京之功但據該營隊目姜發蔡昇王國文李春等供稱四月二十七日南路營失陷阮欽並無見陣不知去向至顏子京係衆目兵所獲而千總在府有無從賊百隊不

敢保則阮欽蹤跡未可定也把總李興盛為賊首郭國正所擒據姜發蔡昇王國文李春等供稱四月二十九日興盛脅從于國正六月二十三日有同百隊將鄭定瑞首級解赴軍前而該弁堅供並未從賊有陳石林堯等保結則蹤跡亦未可定也北路營把總葉旺則兵敗潛匿民家聞陳徽鄭高募兵攻諸羅出與共事旋又失去及投大師招出賊目陳奏凱一名但羅叅將家人現在首告其從賊則蹤跡亦未可定也臺協水師左營把

總余勲據供分防鹿仔港于五月初三日奉檄調帶兵五十名配船三隻初五夜入鹿耳門到安平鎮始知府陷令各兵密埋軍器紅毛城側散匿民家此說殊不可信賊既陷府五日口岸戒嚴豈容夜舟潛入鹿耳復抵安平且既知賊據無故意登岸埋藏軍器之理安平地方淺狹雞犬難藏安得五十名兵皆有親戚窩匿無人知覺或有言其初五晚舟至隙子被擒在賊首黃日昇處六七日而該弁並不實供求工反拙又亦未可遽定

也則李由陳喜阮欽李興盛及葉旺涂勲等六弁應請
憲臺親訊定奪南路營千總張世德托故先逃遂回內
地至今行提並未到案無從查核經于詳明臺回千總
俸乾事赴藩司取供在案應行司就近勘詳另報鎮標
中營把總王丑並未見敵接戰于五月初一日賁公文
赴鹿耳門望見府陷遂奔澎湖復搭得勝鳥商船逸去
泉州其後隨師効力同入鹿耳安平當與奉叅退澎湖
六員一體擬議在周應龍張彥賢之間澎湖協右營把總

吳良在臺修理戰艦借賊回澎湖經前提督訊解督部院
軍前尋亦病死南路營把總薛雄已經病故無庸再議
北路營守備劉錫因公赴省領餉臺協左營千總董方
奉差赴廈接餉中營把總李祐赴廈考驗賊亂時皆不
在臺均應于全臺底定事案內確查功績議叙南路營
把總魏明賊亂時先已離臺赴考後隨師救援淡水澎
協左營千總李耀國在臺修理戰艦府陷回澎後隨師
往援淡水把總陳賢四月內護商到臺二十八日奉差

赴澎湖援奔馳履省後隨師往援淡水淡水營把總湯
喬在臺修理戰艦府陷仍回淡水金門鎮標右營千總
劉使帶領班兵赴淡換回至斗罵汛聞賊陷府仍帶班
兵回淡協防均應于遵

旨事案內同淡水官兵一體議叙此四十一員存亡功
罪之大概也除劉錫董方等八員另查功績分報張世
德一弁就近勘詳另擬薛雄吳良已故無庸更議其餘
三十員中從容就義臨大節而不可奪當以劉得紫為

第一而間關險難力圖恢復之陳徽鄭高龔捷吳德光馬雲驥等次之李信陳宋張成吳益又次之黃蘗之謀事雖不就其志可嘉則周應遂等諸人又次之其餘或擒或免竄身草澤髮辮完全均無疑議雖內有許陞陳雲李先春韓勝等四弁割辮逃生皆由勢窮力竭混跡躬避實非從賊即李由陳喜等數弁蹤跡未明另請覆訊亦未有受賊要職顯然殺害官兵芟夷民庶不過畏死貪生覩顏喪節應否從寬從嚴統俟憲臺親訊定奪

[illegible]

東征集卷六